

Gabinete Mike Eman ta optimalisando barionan na Aruba

Un mihor infraestructura y mas sentido di comunitarismo



“**NOS** ta sinti cu ta nos responsabilidad pa sigura cu e comunidad di Aruba ta disfruta di un mihor forma di bida y cu nos bishitantenan haya un experiencia cu nunca antes nan a sinti ningun otro caminda. Esaki t’e meta di Renobacion Urbano,” palabranan di Prome Minister, Mike Eman riba e vision di su Gabinete p’e barionan di Aruba. Gobierno di Aruba ta sinti cu e isla nunca tabatin un plan estructura pa traha riba barionan den forma uniforme. Asina p.e. a traha caminda, pero nunca estructura. Gobierno y su Team di Renobacion Urbano tin e lema: “Ban renoba nos bario, hunto”. Di e manera aki e ciudadanonan mes ta contribui na loke mester bira e Aruba di futuro. Ya caba a cuminsa parcialmente na Juana Morto y Madiki. Den caso di e bario di Madiki, esaki ta consisti di tres fase di ehecucion di Plan di Renobacion. A tene diferente anochi di informacion ilustrando e plannan cu a hinca den otro. E base di e programanan di BoBario ta consisti di dos pilar primordial, manera ir. Raffy Kock semper ta splica den su anochinan di informacion den e barionan: Desaroyo di Espacio Publico y Desaroyo Social di Bario, den cua e ultimo aki

e aporte di e habitantenan di e bario ta masha importante. Pero tambe kier cosecha conocimiento mutuo entre Gobierno y habitantenan di e bario. Pa loke t’e parti infraestructural di BoBario, e ta un proceso cu a cuminsa cana a base di e congresonan di Renobacion Urbano I & II, unda cu estudionan integral a ser haci pa cu desaroyo duradero di e barionan. Di aki a sali e basenan cu ta wordo implementa den renobacion di e barionan, unda iluminacion di calidad, movilidad, accesibilidad y siguridad di e peaton como tambe infraestructura di matanan ta bira puntonan cu ta haya mes hopi atencion cu e caminda di auto, cu t’e elemento di infraestructura cu prioridad mas halto prome cu e maneho nobo di e Gobierno aki. “Hopi hende ta puntra pakico un cambio,” ir. Raffy Kock, encarga cu Renobacion Urbano ta bisa cu hopi ta puntra. Su contesta semper ta: Crea igualdad, salud, siguridad y oportunidad pa tur usuario di espacio publico. Aworaki no tin un forma estructura pa esnan cu kier jog of cana den forma sigur y mantene curpa den condicion. Structurando e areanan publico den tur bario, kier logra esaki di un forma uniforme. Tur e ideanan cu a

haya pa realisa e diseñonan ta basa riba combersacion teni cu pueblo, di reunionnan manera Townhall Meetings, di exper-tonan local y internacional. Pero loke por bisa sigur ta cu 60% di e kehonan di e ciudadanonan ta riba e infraestructura. Pesey esaki ta hunga un rol importante den renobacion di barionan. Den Madiki, mescos cu den otro barionan, ta crea estructura caminda ta completa y balansa e cayanan. Esaki ta nifica: Acomoda espacio pa cana, pa core bicicleta y pa auto den e cayanan existente di nos bario; suficiente iluminacion den henter e caya unda cu for di auto por identifica e peaton cu ta bay cruza y unda e habitantenan tin mas bista di locual ta sosode riba caya, mehorando considerabelmente e percepcion di siguridad; maneho di e fluho di awa ora di yobida; pero tambe espacionan recreativo y berde. Tur esaki ta cay bou di e aspecto di infraestructura.

Den organisacion di e espacio, esaki ta basa riba tres punto: E fluho di trafico cu un sistema estructura di parkeo, pa usuari-onan; espacio pa peaton integra cu otro servicionan manera ponemento di baki di sushi pa wordo recoge; y e parti di em-



beyecimento berde y e sistema di maneho di fluho di awa. Tur e aspectonan aki ta comun den e 23 barionan cu ta cay bou di e plan renobacion urbano. Pues mihor iluminacion, mihor reparticion di areanan publico, e mesun sistema di parkeer. E Gobierno aki a reconoce cu e proyecto no por ta exitoso si e informenan no ta ser comunica na e habitantenan unda cu tin posibilidad pa nan tambe eherce influencia riba e cambionan den nan bario. Hopi biaha tin desaroyonan social den un bario cu por trece cu habitantenan no ta acepta e

cambionan di infraestructura, pasobra e problemanan social no ta ser solucionan. P’esaki e proyecto BoBario tin su parti social unda ta duna atencion mas specifico pa cada bario y asina logra entusiasmo y participacion di e comunidad y asina traha na un proyecto integral. Tur esaki ta trece cune ciudadanonan felis y contento di por contribui cu nan propio bario. Pesey ta masha importante p’e ciudadanonan duna nan contribucion pa medio di creacion di comision y/of fundacion cu ta representa e habitantenan.